

文

章

辨

體

文章辨體卷之四十一

海虞後學吳訥編集

雜著

詰鳳

唐陳黯

揚雄云君子在治若鳳在亂若鳳謂隱見之得宜也追覽其劇  
秦美新則有異乎是雄仕漢遇新室之亂既不能去之又懼禍  
及乃爲斯文以媚而取容嗚呼鳳固若是耶果若是則鳳遇  
繒而猶徊翔其間耶君子之仕也所以行道道之不行也則可  
以明其節彼莽之不臣雄時在列宜以君臣之義興亡之理匡  
救之以行其道苟畏其威愛其死則可拔簪高謝以明其節詎  
有苟祿貪生徇非飾詐廣引秦過以喻惡德則是稔其篡逆也  
與古之持顛危死名節者背而馳也嚮者所著若鳳之說得不  
爲誣鳳也哉雞常禽也晦晦而不迷其候鳳靈鳥也在亂而不

知其時耶噫言之不思有如是耶或曰古人臨危制變亦權也雄知莽之不可匡也故矯爲其辭姑務脫禍是亦權也何過之深歟曰不然夫權者聖人有焉所以不失其道未見捨其道而從其權昔仲尼仕魯以季桓子荒齊樂知其不可匡也乃去之曾不聞矯爲其辭以求庸於魯雄慕仲尼之教以著書立言爲事夫立言者豈不欲人之從教耶且已不能信又況求信於人乎語曰君子先言而後從之斯言可欺也哉

拜禹言

李翱

貞元十五年六月二十九日隴西李翱敬再拜禹之堂下自賓階升北面立弗敢歎弗敢祈退降復敬再拜哭而歸且歌曰惟天地之無窮哀人生之長勤往者予弗及來者吾弗聞已而已而

鞭賈

柳子厚

市之鬻鞭者八問之其賈宜五十必曰五萬復之以五十則伏而笑以五百則小怒五千則大怒必五萬而後可有富者子適市買鞭出五萬持以夸余視其首則拳蹙而不遂視其握則蹇仄而不植其行水者一去一來不相承其節朽黑而無文材搯之滅爪而不得其所窮舉之翾然若揮虛焉余曰子何取於是而不愛五萬曰吾愛其黃而澤且賈者云余乃召僮爚湯以濯之則遯然枯蒼然白嚮之黃者梔也澤者蠟也富者不悅然猶持之三年後出東郊爭道長樂坂下馬相踈因大擊鞭折而爲五六馬踈不已墜於地傷焉視其內則空空然其理若糞壤無所賴者今之梔其貌蠟其言以求賈技於朝者當其分則善一誤而過其分則喜當其分則反怒曰余曷不至於公卿然而至焉者亦良多矣居無事雖過三年不害當其有事驅之於陳力之列以御乎物以夫空空之內糞壤之理而以責其大擊之效

惡有不折其用而獲墜傷之患乎

跛奚移文

宋黃魯植

凡人物生世靡不有用在用之盡其所能爾山谷  
跛奚文蓋以風切當世司用人之柄者云

女弟阿通歸李安詩爲置婢無所得廼得跛奚蹢躅離跣不利  
走趨顙出屋檐足達戶樞三嫗挽不來兩嫗推不去主人不悅  
厨人罵怒黃子笑之曰堯牽羊而舜鞭之羊不得食堯舜俱疲  
百羊在谷牧一童子草露晞而出草露濕而歸不亡一羊在其  
指擒故曰使人也器之物有所不可則亦有所宜警夜偷者不  
以馬司晝漏者不以雞準繩矩異用殊施天傾西北地缺東  
南尺有所不逮寸有所罅子不通之則屨不可運土簣不可當  
屨坐而睨之大小俱廢子如通之則瞽者之耳聾者之目絕利  
一源收功十百事固有積於一則盡善徧用智則無功有所不

能乃有所大能焉呼跋奚來前吾爲若語之汝能與壯士拔距  
乎能與群狙賦茅乎能與八駿取路乎能逐三窟狡兔乎曰  
不能曰是固不能閨門之內固無所事此今將語若可爲者汝  
無狀於行當任坐作不得頑癡自今謹飭晨入庖舍滌滄湍  
料簡蔬茹留精黜摘臠肉法欲方膾魚法欲長麪波如截昉煮  
餅深注湯和糜勿投醯醢曰晚用薑葱涼不欲集旋俎不欲黃  
飯不欲著牙揚盆勿駐少進火守雉水沃沸鬲斟酌薤毛生熟  
必告姨媼臨食爬垢捺髮染指舐杓嘖截懷骨事無小大盡當  
關白食了條器三正三反收拭蠲潔寢匙覆碗陶瓦髹素視在  
謹數兄弟爲行牡牝相當日中事間浣衣漱襦器穢器淨謹循  
其初素衣當白染衣增色梔鬱爲黃紅螺蚬光按藍荇草茅鬼  
橐皂漿胰粉白無不媚好燥濕處亭尉帖坦平來往之役資宅  
使令牛羊下來喚雞棲桀撐拒門關閑護草竊飲飯猫犬烟塞

鼠穴几烏攫肉猫觸鼎犬舐鎗鼠窺甕皆汝之罪也春蠶三吐  
升簇自晝七晝七夜無得停火紵麻藤葛蕉莊絺綌錫踈手作  
無有停時紵緝偷工夫一日得半工一縷亦有餘暑時蘊蒸扇  
凉密冰薰艾出蚊冰盤去蠅果生守樹果熟守莒執弓懷彈驅  
嚇飛鳥無得吭嘗日使殘少姆嫗罵譏瘡痢泄嘔天寒置籠衣  
食畢烘搔痒抑痛炙手擱凍無事倚牆鞦韆作堂上叫呼傳  
聲代諾截長續短鳬鶴皆憂持勤補拙與巧者儔凡前之爲汝  
能之不跛奚對曰我缺於足猶全於手如前之爲雖勞何咎黃  
子曰若是則不旣有用矣乎皆應曰然無不意滿

責沈貽知默姪

陳了翁

適越而北轅越不可至徙越人而置於齊里則越語可易而爲  
齊然則氣質一定不能易其習者非以其不學歟氣質之用狹  
道學之力大天氣而地質無物不然人藐乎其間亦一物耳物

與物奚以相遠或哲或愚不係其習乎思誠之道莫先於學務學之要在於求師顏子之不遷不貳得於孔子晞顏之人將孰師焉葉公問孔子於子路子路不對夫葉公有知人之明有謀國之忠愛賢而得民慎微而憂遠其事皆有可指其遺語之記於緇衣者亦可觀焉楚國之賢誰出其右子路非慢賢者也魯有仲尼而彼不知焉則於其間也何足對哉陳良楚產也而能使北方之學者莫或先之故孟子以良爲豪傑之士爲其能悅周公孔子之道而已不知仲尼則雖賢如子高亦孔門之所不對也爲事而稽古者可不鑑哉予元豐乙丑爲貢院點檢官適與校書郎范公醇夫同舍公嘗論顏子之不遷不貳惟伯淳有之予問公曰伯淳誰也公默然久之曰不知有程伯淳耶予謝曰生長東南實未知也時予年二十九矣自是以來常以寡陋自愧得其傳者如楊中立先生亦未之識也崇寧初兄子漸就學其門時予在合浦始



獲通問予之內訟改過賴其一言漸於是時亦以所聞警予之  
繆予始忽其言久而後知其爲藥石也今漸來天台考其學益  
進問其言益可喜陶染薰鑄有自來矣舉修步於南溟觀洪瀾  
於北壑此可遠之基也始之不謀何以得此古之善學者心遠  
而莫禦然後氣融而無間物格而不二然後養熟而道凝山上  
有木其進也漸合抱之幹豈一朝一夕之可俟哉人之患在不  
立其基基立而不勉亦何以愈於彼乎物之終始可不嚴哉予  
以多言取禍尚未誅殛戴恩自幸不知歲月之久而生死之有  
二也旣老且病手痺目昏簡編筆硯殆將捐棄今於漸之行不  
能忘言作責泥以貽之喜漸之能謀其始而篤之使有成也

字朱元晦祝詞

劉屏山

冠而飲名粵惟古制朱氏子熹幼而騰異交朋尚焉請祝以字  
字以元晦表名之義木晦於根春容雖敷人晦於身神明內腴

昔者曾子稱其友曰有若無實若虛不斥厥名而傳於書雖百世之遠也揣其氣象知顏氏如愚迹參並遊英馳俊驅豈無他人夫誰敢居自諸子言志回欲無伐一宣於聲終身弗越陋巷闇然其光烈烈從事於茲惟參也無慚貫道雖一省身則三夾輔孔門翱翔兩驂學的欲工吾知斯之爲指南惟先吏部文儒之粹彪炳育珍又華其繼來茲講磨融融熹熹真聰廓開如原之方駛望洋渺瀰老成縮氣古人不云乎純亦不已悵友道之衰變切切而唯唯子德不日新則時子之耻勿謂此耳充之則充借曰合矣宜養於蒙言而思悲動而思蹟凜乎惴惴惟顏曾是畏

正紀

洪武胡仲伸

六合之大萬民之衆有紀焉而後持之何紀也曰天紀也地紀也人紀也天紀不正不足以爲君地紀不正不足以爲國人紀

不正不足以爲天下何謂天紀天子無所受命者也其所受命者天也故國君受命於天子天子受命於天義至公也堯有天下七十載而得舜舜有天下五十載而得禹禹以德禹以功其得天下也不曰堯舜與之而曰天與之也由禹之後桀承其紀而自絕於天故湯放之由湯之後紂承其紀而又絕於天故武王伐之天下不以湯武爲篡而曰此天吏也天之所廢孰能興之天之所興又可廢乎皆歷數也虞夏商周之取與異道皆推至誠以順天者也而後世欲以詐力爲之始亂天下之大義矣何謂地紀中國之與夷狄內外之辨也以中國治中國以夷狄治夷狄勢至順也自三危積石負終南地絡之陰抵大華而北逾大河並太行抵恒山之右循塞垣至於濊貊朝鮮是謂北紀胡門也自岷山嶓冢負地絡之陽並南山抵上洛而南逾江漢至於荆衡循嶺徼至于百粵是謂南紀越門也其間包有冀寧

青徐荆揚豫梁雍之地土黨天下之脊也弘農分陝兩河之會也其外四夷居之風氣不同習俗亦異虞有三苗之叛周有昆夷之患雖有聖人不能使之同仁從其族類可也而後務勤遠畧欲以冠帶治之始失天下之大執矣非一朝一夕之故也由漢之後汨天之紀者莫曹操若也由晉之後汨地之紀者莫劉淵若也魏晉之事衰世之事也以唐高祖太宗之爲君而不能挈天下歸之正者何也高祖起兵晉陽下西河取臨汾鼓行而入長安除暴隋之禁約法十有二條民懷其德威震海內與漢何異哉漢王即位汜水之上蕭王即位鄡南君子與之唐受隋禪獨不與焉非有惡於唐也楊廣殺父與君天下之首惡也與天下誅之大義也不知出此而從事於繁文僞飾猶竊人之鐘自掩其耳知其不可而猶爲之是以魏晉自處矣太宗承武德之後以百戰之師命李靖等將之擒頡利降伊吾平党項西通

吐蕃回紇南致謝元深望人之國俘人之衆驚然自以秦始皇  
漢武帝不若也魏徵言之不聽顏師古李百藥言之又不聽好  
須臾之名忘將來之患卒從溫彥博之議虛漢南之境徙其部  
落居吾內地留其君長備吾屯衛而帝加號天可汗刻之璽書  
是以夷狄自處矣以夷狄處者以夷狄與之以魏晉處者以魏  
晉與之春秋之義也蓋將以正天地之紀也天地之紀不正雖  
有人紀君臣也父子也夫婦也朋友之交也長幼之序也何自  
而立哉而人紀之在天下固有不可泯焉者也當魏晉之初毛  
玚荀彧雖以操之奉獻帝爲扶弘義示至公爲當時之士如甘  
寧周瑜金祿耿紀之徒奮不與之淵雖尊漢安樂自謂漢氏之  
甥而孔恂逆知其奸睦夸不仕其朝忠臣孝子遭時多難未嘗  
不駢首接跡於當世鼎鑊在前而不辟刀鋸在後而不顧吾以  
是知生人之紀未嘗泯也有能正者豈難也哉故天下莫要於

人紀莫嚴於地紀莫尊於天紀亂其一則其二隨之亂其二則三者夷矣漢不亂則操固漢之征西也晉不殘則淵固晉之都尉也天地之紀不正由生人之紀先紊之也非秦隋之亂漢高帝唐太宗亦何自而興哉漢承秦之變變而近正者也唐承隋之變變而不善正者也二紀之立其堯舜禹湯文武之世乎善爲天下者亦法乎堯舜禹湯文武而已矣

### 尚賢

人君兼天下之所有以貴則天下莫與侔其勢也以富則天下莫與較其利也以權則天下生殺之所由懸也何求而不得何爲而不成而必有待於賢者知天下不可自用也人雖聰明睿知一堵之外目有所不見十室之間耳有所不聞萬鈞之重力有所不舉百工之事能有所不通况天下大器也舉天下之大器重任也而三代王者或以不明而克綏先祿或以幼冲而弘

濟多難或負過人之才強力辨捷而遂亡國喪家不保其身豈天下之大器重任材力者有所不堪而幼冲不明者豈能勝哉大甲成王以有伊尹周公爲之輔佐故天下不勞而治夏癸商辛有終古龍逢而不能聽有膠鬲商容而不能用法天下不治而底于滅亡用得其人則大甲之不明成王之幼冲可以遷善改過緝熙光明而爲令主不得其人而自用之則雖夏癸之勇力商辛之辨捷負過人之才而不免爲獨夫得失之幾不可不審也亡國之人非盡不肖興王之臣非必皆賢天之生才何代無之伊尹仲虺巫咸甘盤傳說非盡生於亳邑也閼天泰顛散宜生南宮适大公望畢公毛公非盡出於豐鎬也亦非素有位而貴也遇之以其道則耕築漁釣遠近田野海濱之人皆起而任公卿大夫之責伊尹傳說大公望之於商周是也遇之不以其道雖千乘之國萬鍾之粟曾不足以延縉紳游談之士孟軻

氏之於齊梁是也。道合則合，道離則離，去就之義不可苟也。至治之世，以德相尚，天下無不可仕之國。故君爲官，擇人而臣；無擇官，士患德不脩，不患無聞也；患業不廣，不患無位也。德脩而業廣矣，雖欲處衡門而樂考槃也，詢衆庶者在閭，其能舍乎？興賢能者在鄉，其能不舉乎？由鄉而達於諸侯，貢于天子之廷，三適者受上賞，不賢者貶爵，土則諸侯之責重矣。賢者受之以官，大賢授大官，能者任之以事，大能任大事，則天子之任又重矣。商周之盛，上無曠官，下無遺才，其君臣遇合蓋如此。周德旣衰，春秋戰國之際，不能統一，於是君擇臣而臣亦擇君以事之。然猶以義相尚，侯嬴魏夷門監也，而魏之公子枉車騎虛左迎之；毛遂趙下士也，而楚烈王願奉社稷，歃血聽之。魯仲連東海布衣也，居邯鄲圍城之中，不肯西面而帝。秦人以爲天下士也，警然負其高世之志，伸大義於諸侯之上。漢唐數百年之盛，未有



肖其風烈者高帝太宗解衣輟哺傾身散財從海內之士舉天下於反掌之間傳世永久當是時也曰奇士者有矣曰國士者有矣求所謂天下士果何人哉士氣卑而主勢崇偈偈焉以權利相任使其人固有不屑者矣如魯兩生野王二老世豈盡知之乎夫揭數尺之竿懸尋丈之緡鉤螭爲餌而投之河海所得者鯢鮪之肉耳吞舟之魚終不足致也其爲術亦疏矣人主之心其精神念慮與天地相酢酢苟積至誠廓至公求天下之賢以寅亮天工孰不風動而應之於天下至廣人才至衆其要莫先於論相相之賢否官之得失所係也官之得失政之隆替所係也由君子言之是猶後世之論相也未能盡古之道也治天下有本君之謂也治天下有要賢之謂也其本正者天下不勞而治其要得者天下之本不勞而正漢唐之君莫或知之其有天下非不求賢也其求而用之者不過以郡國之政有不舉

耳朝廷之治有不備耳公卿大夫之賢有不稱耳未嘗知正  
下之本也爲公卿大夫者亦以爲能寄郡國之政佐朝廷之治  
於職足矣未有能正天下之本者也王伯之畧混聖賢之道寔  
非此其故乎蓋至趙宋而後世之君子有以此爲任者而其主  
不能擇也帝王之大經大本託之空言而無補當此之時得君  
專且久者皆時匪人假儒術以濟其奸者也易言拔茅連茹泰  
之君子以此進其君子否之小人亦以此進其小人二者迭爲  
消長故知人之難非獨難於君子而深難於小人至於君子之  
小人則又難也其言辨其行堅其見聞之博足以出人之不能  
其情貌之深足以欺人之不測其知術之巧足以移人所好而  
不悟其才藝之美足以行人所難而不憚其名君子實則戾也  
辨之不早去之不果植爲朋黨惡知其非君子也雖有君子橫  
罹口語又惡知其非小人也知人則哲帝陶唐氏猶難之共工

崇伯之屬衆所共賢者也而帝獨以爲非賢其後果不賢也於是去之而帝之庭無惡人矣於是禹臯陶爲帝臣者皆得著其成績人主欲進賢而不能遠小人不足以言知人不知人不足以言得人非常之士待非常之主然後用之天降時雨山川出雲於此時也蓋必有之矣其興於此時予必得而見之矣

### 慎習

天下之執窮則變由治而趨亂者其變易雖一儉人懷之而有餘由亂而趨治者其變難雖合天下之智力爲之而不足由秦以來天下之變數矣議者莫不慨然欲追復先王之舊歷漢唐千數百年而卒循乎秦人之敝者此豈其執難而力不足哉荀卿子曰法後王一天下制度又曰法二後王謂之不雅蓋卿有以啓之也自卿之論興其徒李斯用之以相秦凡可以變古者莫不假秦之柄奮其恣睢之心而論之雖商鞅之刻薄下若是

之列也。鞅廢井田，止秦之土地法令，止秦之人民而斯也。尊主爲皇帝，舉天下以爲郡縣，舉天下不復有井田。夷其城郭，銷其兵刃，人主之勢孤立於上，而怨起於下。計無所出，益倒行而逆施之。燔詩書以塗民之耳目，黜儒術以滅天下之口。說聽守者律令也，所師者刀筆吏也。其變旣極，其習旣成，秦亡而漢承之。聖王之繼亂世，掃除其迹而悉去之，崇教化而興起之，此其幾也。陳經立紀，以爲萬世法程，此又一幾也。高帝以寬仁定天下，規模宏遠矣。然未嘗有一於此。其後賈誼言之於文帝，董仲舒言之於武帝，皆不能用。又其後王吉言之，而宣帝恬不以爲意。觀高帝命叔孫博士之言，令度吾所能行爲之，天下事孰非人主所能者？奈何帝之自畫如此，而群臣不足佐之？創業之君，後昆所取法，由是而文帝有卑之無甚高之喻，宣帝有漢家自有制度之語，當更化而不更化，當改制而不改制，一切緣秦之

故雜伯以爲治逮于中興光武以吏事責公卿顯宗以耳目爲明察文法密而職任遠辨急過而恩意少雖從事儒雅投戈講藝臨雍拜老有緝熙揖讓之風未能盡更化改制之實也故朱浮言罷斥之擾於前陳寵建輕刑之議於後建初之政所以濟永平之失也之數君者在當時號爲賢主且去古未遠而因陋就簡未嘗取先王之法一試爲之爲之不效舍之可也不爲而舍之烏知其不可乎蓋其溺於所習者久矣辟之戎人生於戎夷人生於夷少長所濡染者皆夷戎也中國之禮義未嘗接焉雖知其美不能使之一朝去其夷戎之俗此豈其性殊哉習固使之耳古今之相去何以異此有能善變其習者果執禦之魏晉之衰天下之亂極矣元魏起代北其先土托后跋之裔也其人民被旃控弦之屬也與漢不侔矣宜未易以禮法理也而孝文遷都洛邑挈其人民而居之均田別里崇祀建學國人莫

不有忤心焉獨排衆議而容之王肅季安世之流釋胡服而爲冠帶絕比俗以事詩書王通氏曰中國之道不墜孝文之力也豈不信乎及隋之衰天下又大亂而唐承之太宗却封倫之對從魏徵之勸貞觀之初力行仁義其爲化也得矣制官以六典制兵以府衛制民以均田制賦以租庸調其爲制也備矣行之數歲家給人足行旅不齎糧外戶不待閉方制四夷之外太宗之效可謂盛矣故宋儒以爲由文武之治千有餘歲而有太宗之爲皆方之於漢其寬仁孰與高帝其玄默孰與文帝其所以致此者由其不惑於後世之論能自拔於秦漢之習也向使孝文無卓然之見必爲之志雖得中國終於戎翟而止耳使太宗有躬行之實名世之佐舉唐之治又豈殷周之不若乎故俗之不淳不患也刑之不措不患也功之不遂不患也而患無必爲之志躬行之實持之者未久也惟聖爲能盡倫惟王爲能盡制

三代之興其王皆聖人也其所以爲天下者莫不本諸天理要  
諸人心大法之則大治小法之則小治苟以爲遠則莫之法也  
其道固存其意猶可識也春秋譏變法而太復古聖人豈好爲  
異哉懼後世不知有先王之法故假筆削力爭之然猶懼不勝  
况順而下之是猶決江河而放之陸軌必胥溺而已耳故余不  
責斯之不師古而深悼况之法後王由其有以啓之也君子度  
已以繩接人用耒夫與世遷徙而偃仰者戰國之遺習也卿之  
意不過如此學術不醇而遂以毒天下大史公曰法後王何也  
以其近已而俗變相類議卑而易行也天下有能知其近而相  
類者爲不可法也卑而易行者爲不可行也則秦人之敝去矣  
非聖人其孰能之

### 皇初

天地之初未始有物也馮馮翼翼由一而二二氣則一睢睢盱

野由二而三才則一天下同由之謂道同得之謂德同善之  
謂性同靈之謂心道一也人皆由之而有不由者焉德一也人  
皆得之而有不得者焉性一也人皆善而有不善者焉此人也  
非天也心不能盡性則不能盡德矣不能盡德則不能盡道矣  
故雖天也莫與能焉而成能者聖人也此聖人所以爲萬世開  
太平也鴻荒之世天地草昧民物雜糅穴居野處雖岐息壤動  
之屬不異也而不以爲墊毛血食飲雖驚擊攢搏之屬不異也  
而不以爲臊蒙以羽革草木而不以爲野瘞以積薪而不以爲  
薄約以結繩而不以爲愚其民安之免於飢寒而不及於災患  
斯可矣五龍燧人彼十有七氏者何氏也九頭攝提彼十紀者  
又何紀也其人果聖而世果治也歟宜於此有以變而通之矣  
何至委其人於顛蒙倥侗之域累數十萬年同於禽犢而不少  
拯之豈天生民立君之意乎必不然矣世雖傳之聖人不言也聖



人不言者蓋無稽而慎之也道本於三王德著於五帝法備於  
三王過此以往未之能尚也德固道也而法亦道也所因者異  
耳山川之風氣不同五方之民異俗古今之風氣不侔歷代之  
治異宜其變皆所以納民於道也庖犧氏神農氏軒轅氏繼天  
而畋漁農父之所務也其制不過宮室舟車關市弧矢杵臼而  
工商武夫之所能也方其未創之時民固無所措其心思手足  
之力矣故必聖人而後爲之爲之不足必聖人而後繼之因時  
變通不變不通也書契之作法之始也衣裳之治德之昭也其  
化神而民宜有善而不知天下同歸於道泯乎其迹矣軒轅之  
後是爲五帝歷少昊高陽高辛而至唐虞唐虞之帝爲堯舜聖  
聖相承疇咨都兪南面以臨群臣其治猶黃帝也而政教禮樂  
之在天下有皐陶稷契以任之有伯夷后夔之屬以典之而又

以伯禹總焉雖有洪水之災四凶之惡不勞而治帝何爲哉天下同歸於德雖莫之名焉而煥乎其文矣有虞之後夏后氏承帝執中之傳以功踐帝之位九土旣平九疇旣錫彜倫收叙三年而天下遂於仁不得賢而與之而其子啓能敬承父道以天下與其子猶與賢也及啓之身有扈不服于甘之役大戰而後服之欲如有虞之世不可得矣父子相繼所以止天下之亂是乃變而通之也夏德旣衰商人繼之商德旣衰周人繼之南巢之放湯有慙德牧野之師武王以爲有光焉則居之不疑矣無復商人之意矣其順天應人則一也故爲臣易位天下不以爲非是亦變而通之也撥亂世而反之正天下同歸於義義形而法益備矣禹之興也承乎虞而不及虞者也文王之興承乎商而進乎商者也皆三代之盛王也其道同其德異者有之其德同其法異者有之其法同其制異者有之存乎其人焉爾存乎

其世焉爾消息者候之徵也淳龐者俗之判也理亂者變之象也質文者治之體也損益者制之宜也變通者權之用也神化者用之妙也通乎消息之候審乎淳龐之俗明乎理亂之幾別乎質文之體損益變通合乎神化之妙此聖人之所同也及周之衰王降而爲伯伯降而爲戰國諸子分裂聖人之道人驚其私智異說倚挈是非梟亂名實世患苦之雖爲諸子者亦病焉於是刑名農墨之家崇儉質尚功實而老子貴清淨將棄仁義蔑禮法與天下共反其朴於太古之時意在懲周之弊而非大公至正之道也漢用其術文景之世天下無事最爲有効而非二帝三皇之所尚也聖人之道辟之天地明之爲日月潤之爲雨露變之爲風霆爲鬼神莫不由天地以成化竅之爲山川微之爲草木爲昆虫莫不由天地以成體而天地之所以爲天地者易簡而已矣聖人在位大之爲朝廷之遜禪父子之繼立變

之爲征討君臣之革命皆天命所當然重之爲郊廟社稷之事  
公卿大夫賢不肖之黜陟下至閭伍井牧之賦庠序之教關市  
權衡度量之制刑賞之具禮樂之用皆民生之不可去者也聖  
人何容心哉亦行其所無事而已矣故聖人之心天地之心也  
聖人之性天地之性也聖人以其心溥萬物而物無不平以其  
性盡萬物而物無不成非固誅之也有生者各一其性有知者  
各一其心聲氣之同捷於桴鼓念慮之孚堅於金石故曰天地  
感而萬物化生聖人感人心而天下和平聖人之化如神而人  
不與知焉聖人之化如天而神不與能焉蕩蕩乎平平乎皇極  
之道也而非老氏者之所謂道也皇極之道立天下之治得矣  
苟不爲皇猶當爲帝苟不爲帝猶當爲王是三王不足四而五  
帝不足六也

惟義門鄭君仲德旣嗣總家政乃至干師儉堂登進厥家人用告之曰予第予姪予子予孫感聽予訓昔漢相鄼侯置田宅逃在窮鄉作室不對垣墉曰令後世賢師吾儉乃爾攸聞亦爾攸師嗚呼惟爾攸師豈惟鄼侯之儉哉古之人茅茨不剪土階土劔則有若唐堯乃不可不師卑宮室惡衣服非飲食則有若夏禹乃不可不師嗚呼惟堯惟禹時乃聖人猶儉若茲惟予暨爾矧曰庶人柰何弗儉思大儉若車之柅若馬之勒車以柅上馬以勒閑人而無儉情之從欲于何其制相古今邦君及卿士及百姓罔有克儉而或不吉罔有不克儉而或不凶今予與爾其無胥曰儉無益亦無胥曰不儉無愆尚胥夙夜慎哉嗚呼先祖有訓曰毋縱奢侈以干天刑每旦颺之厥惟舊矣今予曷又若茲汝訓惟我鄭氏肇我家于茲自彼有宋我九世祖爰始誕爲義聚越五世廼克臻大競又五世廼底于今今予與汝攸居攸

用厥室廬暨厥什器罔匪先祖之遺無有刻鏤無有奇巧斯其  
咸見之不惟遺我後嗣者若茲我聞先祖之自奉至于裳衣至  
于飲食廼亦無有輕肥惟我先祖豈曰無耳目口鼻之欲亦惟  
不敢不于儉德是尚是若是庸是迪以制厥心以慎厥身惟若  
茲故在我後嗣賴之式克有今日周人有言曰世祿之家鮮克  
由禮敝化奢靡萬世同流予其可不創于時予其敢不訓汝惟  
儉之用爾曷永念之升降在茲則其無滅義無肆欲無怙侈無  
耽樂凡厥服食器用以至于百爲與其過乎奢寧過于儉去厥  
泰亦去其或不泰從厥約以從其所未約嗚呼爾克用予訓爾  
廼克惕于先祖爾亦式克師古之人是之謂義門之彥周還師  
儉堂無覩面目惟爾後人廼亦永有師師厥家人皆曰汝敢不  
恭再拜趨出仲德廼屬眉山蘇伯衡書諸冊具訓于子孫

文統

朱伯賢

文與三才並貫三才而一之者文也日月星漢天文也川嶽草木地文也民彝典章人文也顯三才之道文莫大焉義軒之文見諸圖畫唐虞稽諸典議三代具諸書詩禮春秋遭秦燔滅其幸存者猶章章可睹故易以圖象其文與書道政事其文雅詩發性情其文婉禮辨等威其文理春秋斷以義其文嚴然皆言近而指遠辭約而義周固千萬世之常經不可尚已孔思得其宗言醇以至孟軻識其大言正以辨若左氏之誇莊周多誕荀卿多雜屈宋多怨其文猶近古世稱作者漢興賈誼董仲舒劉向窺見圖經翼闡其道相如楊雄大昌厥辭然皆有志于斯文者獨司馬遷父子頗采經傳國史集群哲之大成紬一家言載諸簡編爲史氏宗其文雄深多奇班固繼作頗就雅馴以倡來學二氏之文遂爲後世之準程也魏晉日流委靡唐韓愈上規姚姒馳騁馬班本經參史制爲文章追配古作宋歐陽修又起

而繼之文統於是乎有在其間柳宗元王安石曾鞏蘇軾亦皆遠追秦漢羽翼韓歐然未免互有優劣烏庠文豈易言哉餘姚景德輝氏明經稽史有志於斯嘗與予劇論文章家體裁及諸子造詣淺深且欲求其宗緒作文統以復之當有知言者耶

### 史槩

古者伏羲氏作書契制文字軒轅之世倉頡主書史唐虞置史官三墳五典八索九丘即古史也夏終古商高勢皆太史也周官有太史小史內志皆掌史事至於列國亦然如晉之乘楚之檮杌魯之春秋是也吾夫子因魯史脩春秋二百四十二年行事始加筆削垂鑒將來漢司馬遷父子頗紬金匱石室之藏兼采詩書左傳國語世本戰國策楚漢春秋史記自五帝訖漢武爲本記十二表十書八世家三十傳七十共一百三十篇成一家言其文雄深多奇卓然爲史氏宗百代史官不能易其法後



漢班固續父彪作西漢書起高帝終孝平凡二百一十年爲本紀十二表八志十列傳七十無世家而有外戚傳自武帝以前頗本於遷其文雅馴後人亦以爲法宋范曄作後漢書起光武凡九紀別爲皇后紀二傳則增立黨錮宦者文苑獨行方術逸民列女等篇但文氣萎下紀述膚陋不免識者之議東晉陳壽集三國舊史撰三國志以魏接漢統屬吳爲傳則大失春秋旨矣習鑿齒嘗著晉漢春秋起光武至晉文平蜀乃爲漢亡惜其書不傳也唐貞觀中太宗以晉史何法盛等十八家制作未善乃勅史官房玄齡褚遂良許敬宗更加纂脩爲紀十志二十列傳七十載紀三十又命李淳風敬播等十三人分掌著述類例多出敬播天文律歷則淳風爲之當時作者有江左餘風文多駢儷非作史之體故太宗親撰四贊以息浮議齊沈約撰宋書梁蕭子顯撰齊書貞觀姚思廉受詔續父察撰梁陳書魏徵裁

其總論北齊魏收撰北魏書唐李百藥撰北齊書唐初今狐德  
蔡岑文本撰北周書顏師古孔穎達魏徵撰隋書房玄齡總之  
六朝以來天下參隔互相牴牾唐李延壽續父業論撰南史起  
宋盡陳又撰北史起魏盡隋共一百八十篇今行于世司馬公  
謂延壽書亦近世佳史陳壽之後可以亞之五代晉劉昫嘗撰  
唐史今謂之舊唐書宋仁宗詔歐陽脩宋祁刪修記志表歐陽  
主之列傳宋祁主之凡十有七年始成天文律歷五行志則劉  
義叟方鎮百官則梅堯臣禮儀兵志則王景義故其成書不無  
差異古之修史多出一家司馬遷班固姚思廉李延壽皆父子  
相繼論撰積數十年然後書成是以通知本末事實貫穿不相  
牴牾其他則未能免也唯五代史宋仁宗以盧多遜所修失實  
命歐陽修復加刪述爲本紀五改后妃爲家人傳五臣傳五又  
別立死節死事一行義兒伶官宦者雜傳七考三世家十一四

夷附錄三其立例皆寓褒貶爲法甚精書臧舊史之半而事蹟稍增議者以爲功不下馬遷而筆力馳騁反無駁雜之病紀例精密則不及耳公亦自謂伶官傳豈下於滑稽哉誠無憾矣宋鄭樵博雅多聞留心史學謂班固不能繼述父志以續馬遷斷漢爲書無復因承古人損益會通之道自此失矣於是總十七史作通志刪其繁文去其重複存華取實自成一家學者便之此史家之大畧也若宋司馬光通鑑朱熹綱目則又資治道存鑒戒之書然紀載事實則全史不可廢也予嘗纂輯馬班歐陽論贊爲三史鈎玄又頗欲知諸史書大要姑稽所聞作史概

文章辨體卷之四十二

海虞後學 吳訥編集

箴

周虞人箴

左傳

芒芒禹迹畫爲九州經啓九道民有寢廟獸有茂草各有攸處  
德用不擾在帝夷羿冒于原獸忘其國恤而思其麇牡武不可  
重用不恢于夏家獸人司原敢告僕夫

太僕箴

漢楊子雲

肅肅太僕車馬是供鏘鏘和鸞駕彼時龍昔在上帝巡狩四宅  
王用三驅前禽是射紂作不令武王征殷檀車孔夏四駟孔昕  
僕夫執轡載駟載駟我與云安我馬惟閑雖馳雖驅匪逸匪愆  
昔有淫羿馳騁忘歸景公千駟而淫於齊詩好牡馬牧於駟野  
輦車就牧而詩人興魯廐焚問人仲尼厚醜孟子蓋惡廐多肥

馬而野有餓莩僕臣司駕敢告執皂

廷尉箴

天降五刑惟夏之績亂茲平民不回不辟昔在蚩尤爰作淫刑  
延于苗民夏氏一作天不寧穆王耄荒甫侯伊謀五刑訓天周以  
阜基厥後凌遲上帝不觶周輕其制秦繁其辜五刑紛紛靡遑  
靡止寇賊滿山刑者半道昔唐虞象刑天民是全紂作炮烙墜  
民于淵故有國者無云何謂是刑是劓無云何害是剝是割一作剕  
惟虐惟殺人莫予柰殷以刑顛秦以酷敗獄臣司理敢告執謁

宗正箴

巍巍帝堯欽親九族經哲宗伯禮有攸訓屬有攸籍各有育于  
世以不錯昔在夏時少康不恭有仍二女五子家降晉獻悖統  
來宣亂序齊桓不胤而忘其宗緒周譏戎女魯喜子同高作秦  
崇而扶蘇被幽宗廟荒墟魂靈靡附伯臣司宗敢告執主

# 大司農箴

時惟大農爰司金穀自京徂荒粒民是解  
厥僚后稷有無遷易實均實贏惟都作程  
帝求衣食厥民攸生上稽二帝下閱三王  
什一而征爲民作常遠近貢篚百姓不忘  
帝王之盛咸在農殖季周爛漫而東作不  
勑膏腴不穫庶物並荒府藏單虛靡積靡  
倉陵遲衰微姬卒以庠秦收大半二世不  
廖泣血之末海內無聊農臣司均敢告執  
繇

## 將作大匠箴

侃侃將作經構宮室墻以禦風宇以蔽日  
寒暑攸除鳥鼠攸除王有宮殿民有宅居  
昔在帝堯茅茨土階夏卑宮觀在彼溝洫  
桀作瑤臺紂爲琬臺人力不堪而帝業不  
卒詩詠宣王由儉改奢觀豐上六大屋小  
家春秋譏刺書彼泉臺兩觀雉門而魯以  
不恢或作長廡而閔子不仁秦築驪阿羸  
姓以顛故人君無云

我貴樓題是遂母云我富淫作極遊在彼墻屋而忘其國戮作  
臣司匠敢告執敵

大理箴

邈矣臯陶翊唐作士設爲犴狴九州允理如石之平如淵之清  
三槐九棘以質以聽罪人斯殛凶旅斯并熙乂帝載勞施作明  
昔在仲尼哀矜聖人子罕禮刑衛人釋難釋之其忠勲亮孝文  
于公哀寡定國廣門負矣邈矣舊訓不遵主慢臣驕虐用其民  
賞以崇欲刑以肆忿評紂作炮烙周人滅殷夏作淫刑湯誓其  
軍衛鞅酷烈卒殖于秦不疑如害禍不及身嗟茲大理慎于爾  
官賞不可不思斷不可不虔或有忠能避害或有孝而見殘吳  
沉子胥殷剖比干莫遂爾情是截是刑無遂爾志以速以殛天  
鑒在顏無細不錄福善災惡其攸甚速理臣司律敢告執  
獄

諫大夫箴

於昭上帝迪並既哲匪于水鑒惟人是察處有誦訓出有旅賁  
木鐸之求爰納道人各有攸訊政以不分昔在大禹拜承昌言  
癸辛暴戾虐及于天逢于周厲慢德不蠲煦煦胥讒人謗乃作  
不顧厥愆是討是格庶類不堪流之彘宅防人之口譬諸防川  
豈不速止潰乃潏潏潏尚塞言壅為賊默默之患用顛厥國  
諫臣司議敢告有翼

女史箴

晉張茂先

茫茫造化二儀既分散氣流形既陶既甄在帝庖羲肇經天人  
爰始夫婦以及君臣家道以正王猷有倫婦德尚柔含章貞吉  
婉孌淑慎正位居室施衿結褵虔恭中饋肅慎爾儀式瞻清懿  
樊姬感莊不食鮮禽衛女矯桓耳忘和音志厲義高而二主易  
心玄熊攀檻馮媛趨進夫豈無畏知死不恠班妾有辭割驩同



輦夫豈不懷防微慮遠道罔隆而不殺物無盛而不衰日中則  
具月滿則微崇由塵積替若駭機人咸知飾其容而莫知飾其  
性性之不飾或愆禮正斧之藻之克念作聖出其言善千里應  
之苟違斯義則同衾以疑夫出言如微而榮辱由茲勿謂幽昧  
靈監無象勿謂玄漠神聽無響無矜爾榮天道惡盈無恃爾貴  
隆隆者墜鑒于小星戒彼攸遂比心蝨斯則繁爾類驪不可以  
黷寵不可以專專實生慢愛極則遷致盈必損理有固然美者  
自美翩以取尤冶容求好君子所讎結恩而絕職此之由故曰  
翼翼矜矜福所以興靖恭自思榮顯所期女史司箴敢告庶姬

大寶箴

唐張蘊古

今來古往俯察仰觀惟辟作福惟君實難主普天之下處王公  
之上任土貢其所求具寮陳其所唱是故恐懼之心日弛邪僻  
之情轉放豈知事起乎所忽禍生乎無妄固以聖人受命極溺

草屯歸罪於已。因心於民。大明無私照。至公無私親。故以一人  
治天下。不以天下奉一人。禮以禁其奢。樂以防其佚。左言而右  
事出警。而入蹕。四時調其條舒。三光同其得失。故身爲之度。而  
聲爲之律。勿謂無知。居高聽卑。勿謂何害。積小就大。樂不可極。  
樂極生哀。欲不可縱。縱欲成災。壯九重於內。所居不過容膝。彼  
昏不知。瑤其臺而瓊其室。羅八珍於前。所食不過適口。唯狂罔  
念。丘其糟而池其酒。勿內荒於色。勿外荒於禽。勿貴難得貨。勿  
聽亡國音。內荒伐人性。外荒蕩人心。難得之貨。侈亡國之音。淫  
勿謂我尊而傲。賢慢士。勿謂我智而拒諫。矜已聞之。夏后據饋。  
頻起。亦有魏帝牽裾不止。安彼反側。如春陽秋露。巍巍蕩蕩。恢  
漢高大度。撫茲庶事。如履薄臨深。戰戰栗栗。用周文小心。詩之  
不識。不知書之無偏。無黨一彼此於膏臆。捐好惡於心想。衆棄  
而緩加刑。衆悅而後行賞。弱其強而治其亂。伸其屈而直其枉。

故曰如衡如石。不定。物以限。物之懸者。輕重自見。如水如鏡。不示物以情。物之鑑者。妍蚩自生。勿渾渾而濁。勿皎皎而清。勿汶汶而闇。勿察察而明。雖冕旒蔽目。而視於未形。雖黈纁塞耳。而聽於無聲。縱心乎湛然之域。遊神於至道之精。知之者。應洪纖而効響。酌之者。隨深淺而皆盈。故曰。天之經地之寧。王之貞。四時不言而代序。萬物無言而化成。豈知帝力而天下和平。吾王撥亂。戡以智力。民懼其威。未懷其德。我皇撫運。扇以淳風。民懷其始。未保其終。爰述金鏡。窮神盡聖。使人以心應言。以行包括。治體抑揚。詞令天下。爲公一人有慶。開羅起祝。援琴命詩。一日二日。念茲在茲。惟人所召。自天祐之。諍臣司直。敢告前疑。

丹宸箴六首

并序

李德裕

臣聞詩云。心乎愛矣。遐不謂矣。此古之賢人所以篤於事君者也。夫跡疏而言親者。危地遠而意忠者。忤然。臣竊念。拔自先聖。

偏荷寵光若不愛君以忠則是上負靈鑒臣頃事先朝屬多陰  
沴嘗著大明賦以諷頗蒙先朝嘉納臣今日盡節明主亦由是  
心昔張敞之守遠郡梅福之在遐徼尚竭誠盡規不避尤悔况  
臣嘗學舊史頗知箴諷雖在疏遠猶思獻替謹稽首上丹宸六  
箴具列於後仰塵睿覽伏積兢惶

宵衣箴

先王德政昧爽以俟鷄鳴既盈日出而視伯禹大聖寸陰爲貴  
光武至仁反文不忌無俾姜后獨去簪珥彤管記言克念前志  
正服箴

聖人作服法象可觀雖在宴游尚不懷安汲黯莊色能正不冠  
楊阜慨然亦譏纁紃四時所御各有其官非此勿服惟辟所難  
罷獻箴

漢文罷獻詔還駟駟繼輅徐驅焉用千里厥後令王亦能恭已

翟襄既焚筒布則毀道德爲麗慈儉爲美不過天道斯爲至理

納誨箴

惟后納誨以求厥中從善如流乃能成功漢驚沉而舉白浮鐘  
魏獻侈怵凌霄作官忠雖不忤而善亦從以視爲瑱是謂塞聰

辨邪箴

居上處深在察微明雖有說隱不能蔽明漢之孝昭獻過周成  
上書知詐照姦得情燕蓋既折玉猷治平百代之後乃流淑聲

防微箴

天子知孝敬遵王度安必思危乃無遺慮亂臣猖獗非可遽數  
玄服莫辨觸瑟始仕栢谷微行豺豕塞路親貌獻殄斯可戒懼

五箴并序

韓退之

人患不知其過既知之不能改是無勇也余生三十有八年髮  
之短者日益白齒之搖者日益脫聰明不及於前時道德日負

於初心其不至於君子而卒爲小人也昭昭矣作五箴以訟其惡云

游箴

余少之時將求多能蚤夜以孜孜余今之特旣飽而嬉夜以無驚嗚呼余乎其無知乎君子之棄而小人之歸乎

言箴

不知言之人烏可與言知言之人默然而其意已傳幕中之辯人反以汝爲叛臺中之評人反以汝爲傾汝不懲邪而嘖嘖以害其生邪

行箴

行與義乖言與法違後雖無害汝可以悔行也無邪言也無頗死而不死汝悔而何宜悔而休汝惡曷瘳宜休而悔汝善安在悔不可追悔不可爲思而斯得汝則弗思

好惡箴

無善而好不觀其道無悖而惡不詳其故前之所好今見其尤從也爲比捨也爲讐前之所惡今見其臧從也爲愧捨也爲狂維讎維比維狂維愧於身不祥於德不義不義不祥維惡之大幾如是爲而不顛沛齒之尚少庸有不思今其老矣不慎胡爲

知名箴

內不足者急於人知需焉有餘厥聞四馳今日告汝知名之法勿病無聞病其曄曄昔者子路惟恐有聞赫然千載德譽愈尊矜汝文章負汝言語乘人不能揜以自取汝非其父汝非其師不請而教誰云不欺欺以賈憎揜以媒怨汝曾不寤以及於難小人在辱亦克知悔及其既寧終莫能戒旣出汝心又銘汝前汝如不顧禍亦宜然

祖聽言動四箴

有序

宋程伊川

顏子問克己復禮之目夫子曰非禮勿視非禮勿聽非禮勿言非禮勿動四者身之用也由乎中而應乎外制於外所以養其中也顏子事斯語所以進於聖人後之學聖人者宜服膺而勿失也作四箴以自警云

視箴

心兮本虛應物無跡操之有要視爲之則蔽交於前其中則遷制之於外以安其內克己復禮久而誠矣

聽箴

人有秉彜本乎天性知誘物化遂亡其正卓彼先覺知止有定閑邪存誠非禮勿聽

言箴

人心之動因言以宣發禁操妄內斯靜專矧是樞機興戎出好吉凶榮辱惟其所召傷易則誕傷煩則支已肆物忤出悖來遠



非法不道欽哉訓辭

動箴

哲人之幾誠之於思志士厲行守之於爲順禮則裕從欲惟危造次克念戰兢自持習與性成聖賢同歸

敬齋箴

草廬曰箴凡十章章四句其一言靜無違其二言動無違其三言表之正其四言裏之正其五言心之無適而達於事其六言事之主而本於心其七總前六章其八言心不能無適之病其九言事不能主一之病其十總結一篇其言持敬工夫周且悉矣正其衣冠尊其瞻視潛心以居對越上帝足容必重手容必恭擇地而蹈折旋蟻封出門如賓承事如祭戰戰兢兢罔敢或易守口如瓶防意如城洞洞屬屬罔敢或輕不西以東不南以北

當事而存靡他其適弗貳于二弗叅以三惟心惟一萬變是監  
從事於斯是曰持敬動靜無違表裏交正須臾有間私欲萬端  
不火而熱不冰而寒毫釐有差天壤易處三綱旣淪九法亦斁  
於乎小子念哉敬哉墨卿司戒敢靈臺

### 夜氣箴

子盍觀夫冬之爲氣乎木歸其根蟄坯其封凝然寂然不見兆  
朕而造化發育之妙實胚胎乎其中蓋闔者闢之基貞者元之  
本而艮所以爲物之始終夫一晝一夜者三百六旬之積故冬  
四時之夜而夜乃一日之冬天壤之間群動俱閒窈然如未判  
之鴻濛維人之身嚮晦冥息亦當以造物而爲宗必齋其心必  
肅其躬不敢弛然自放於牀策之上使慢易非辟得以賊吾之  
衷雖終日乾乾靡容一息之間斷而昏冥易忽之際尤當致戎  
謹之功蓋安其身所以爲朝聽晝訪之地而夜氣深厚則仁義

之心亦浩乎其不窮本既立矣而又致察於事物周旋之頃敬義夾持動靜交養則人欲無隙之可入天理皦乎其昭融然知及之而仁弗能守之亦空言其奚庸爰作箴以自砥常凜凜乎痼恫

廉仁公勤四箴

王寶之

律已以廉

以下四箴皆真西山命名

惟士之廉猶女之潔苟一毫之點污爲終身之玷缺毋謂暗室昭昭四知汝不自愛心之神明其可欺黃金五六駄胡椒八百斛生不足以爲榮千載之後有餘戮彼美君子一鶴一琴望之凜然清風古今

撫民以仁

古者於民饑溺由己心誠求之如保赤子嗚呼入室笑語飲醴嚙肥出行敲朴魯痛癢之不知人心不仁一至於斯淑問之澤

百世猶祀酷吏之後今其餘幾誰甘小人而不爲君子

存心以公

厚姻婭近小人尹氏不平於秉均開誠心布公道武侯所以獨優於王佐故曰本心日月私欲食之大道康莊偏見窒之聽信偏則枉直而惠姦喜怒偏則賞僭而刑濫惟公生明偏則生闇泣事以勤

爾服之華爾饌之豐凡縷絲而顆粟皆民力乎爾供仕焉而曠厥官食焉而怠其事稍有人言胡不自愧昔者君子靡素其餐炎汗浹背日不辭難警枕計功夜不遑安誰爲我師一范一韓夙興夜寐箴

南塘陳茂卿

鷄鳴而寤思慮漸馳盍於其間澹以整之或省舊愆或紬新得次第條理瞭然默識本旣立矣昧爽乃興盥櫛衣冠端坐歛形提掇此心皦如出日嚴肅整齊虛明靜一廼啓方策對越聖賢

夫子在坐顏曾雖先聖師所言親切敬聽弟子問辯反覆參訂  
事至斯應則隨手爲明命赫然常目在之事應旣已我則如故  
方寸湛然凝神息慮動靜循環惟心是監靜存動察勿貳勿參  
讀書之餘間以游泳發舒精神休養性情日昏人倦昏氣易乘  
齋莊正濟振振精明夜久斯寢齊手斂足不作思惟心神歸宿  
養以夜氣貞則復元念茲在茲日夕乾乾

銘

周武王諸銘

出大戴禮

安樂必敬無行可悔一反一側亦不可不志所監不遠在爾听  
代

右席銘

皇皇惟敬口生咥口戕口

右机銘

見爾前慮爾後

右鑑銘

與其溺於人寧溺於淵溺於淵猶可游也溺於人不可救也

右盟盤銘

母曰胡殘其禍將然母曰胡害其禍將大母曰胡傷其禍將長

右楹銘

惡乎危於忿懣惡乎失道於嗜欲於平相忘乎富貴 右杖銘

右帶銘

火滅修容慎戒必恭則壽

言至夜滅火解帶以褒當恭慎也

右履銘

慎之勞勞則富

右觴豆銘

戒之僇僇則逃

夫名難得而易失無慙弗志而曰我知之乎無勤弗及而曰我

右戶銘

杖之乎若風將至必先搖搖雖有聖弗能為謀也

右爨銘

隨天之時以地之財敬祀皇天敬以先時

右劍銘

帶之以為服動必行德行德則興倍德則崩

右弓銘

屈伸之義廢興之行無忘自過

右矛銘

造矛造矛少間弗忍終身之羞

鼎銘

宋正考父

一命而僂再命而偃三命而俯循牆而走饁於是鬻於是糊其口

鼎銘

衛孔悝

六月丁亥公假于太廟公曰叔舅乃祖莊叔左右成公成公乃命莊叔隨難於漢陽卽宮于宗周奔走無射啓右獻公獻公乃命成叔纂乃祖服乃考文叔興舊嗜欲作率慶士躬恤衛國其勤公家夙夜不懈民咸曰休哉公曰叔舅子汝銘若纂乃考服悝拜稽首曰對揚以辟之勤大命施于烝彝鼎

井銘

漢李尤

井之所向寒泉冽清法律取象不槩自平多取不損少汲不盈執憲若斯何有邪傾

小車銘

圓蓋象天方軫則地輪法陰陽動不相離

漏刻銘

昔在先聖配天垂則仰釐七曜俯順坤德乃建日官俾立漏刻  
昏明既序景曜不惑唐命羲和敬授人時懸象著明序以崇熙  
季末不虔德衰于茲挈壺失職刺流在詩

高祖沛泗水亭碑銘

皇皇聖漢兆自沛豐乾降著符精感赤龍承累流裔襲唐末風  
寸木尺土無埃斯亭建號宣基維以沛公揚威斬蛇金精摧傷  
涉關陵郊係獲秦王應門造勢斗壁納忠天期乘祚受爵漢中  
勒陳東征剗擒三秦靈神威佑洪漣是乘漢軍改歌楚衆易心  
誅項討羽諸夏以康陳張畫策蕭勃翼終出爵褒賢烈士封功  
炎火之德彌光以明源清流潔本盛末榮叙將十八贊述股肱  
休勛顯祚永永無疆國寧家安我君是升根生葉茂舊邑是仍



於皇舊寧苗嗣是承天之福祐萬年是興

封燕然山銘

維永元元年秋七月有漢車騎將軍某黃亮聖皇登翼王室納  
于大麓惟清緝熙乃與執金吾耿秉述職巡禦治兵于朔方鷹  
揚之校螭虎之士爰該六師暨南單于東胡烏桓西戎氐羌侯  
王君長之群驍騎十萬元戎輕武長轂四分雷輜蔽路萬有三  
千餘乘勒以八陣泣以威神玄甲耀日朱旗絳天遂凌高闕下  
鷄鹿經磧鹵絕大漠斬溫禺以釁鼓血尸逐以梁鐸然後四校  
橫徂星流彗掃蕭條萬里野無遺寇於是域滅區殫反旆而旋  
考傳驗圖窮覽其山川遂踰涿邪跨安侯乘燕然躡冒頓之區  
落焚老上之龍庭將上以攄高文之宿憤光祖宗之玄靈下以  
安固後嗣恢拓境宇振大漢之天聲茲可謂一勞而久逸曷費  
而永寧也乃遂封山刊石昭銘盛德其辭曰

鑠王師兮征荒裔勦凶虐兮截海外奠其邈兮亘地界封神丘  
兮建隆嵎熙帝載兮振萬世

座右銘

崔子王

無道人之短無說已之長施人慎勿念受施慎勿忘世譽不足  
慕唯仁爲紀綱隱心而後動謗議庸何傷無使名過實守愚聖  
所臧在涅貴不淄曖曖內含光柔弱生之徒老氏誠剛疆行行  
鄙夫志悠悠故難量慎言節飲食知足勝不祥行之苟有恒久  
又自芬芳

劔閣銘

晉張孟陽

巖巖梁山積石峩峩遠屬荆衡近綴岷嶓南通邛樊北達襄斜  
狹過彭碣高踰嵩華惟蜀之門作固作鎮是曰劔閣壁立千仞  
窮地之險極路之峻世濁則逆道清斯順閑由往漢開自有晉  
秦得百二并吞諸侯齊得十二田生獻籌矧茲狹隘土之外區

一人荷戟萬夫趑趑形勝之地匪親勿居昔在武侯中流而誓山河之固見屈吳起興實在德險亦難恃洞庭孟門二國不祀自古迄今天命匪易憑阻作昏鮮不敗績公孫述既滅劉禪氏御璧覆車之軌無或重跡勒銘山阿敢告梁益

瘞硯銘

唐韓退之

隴西李觀元賓始從進士貢在京師或貽之硯既四年悲歡窮泰未嘗廢其用凡與之試藝春官實二年登上第行于褒谷役者劉胤誤墜之地毀焉乃匣歸埋于京師思中昌黎韓愈其友人也贊且識云

土乎質陶乎成器復其質非生死類全斯用毀不忍棄埋而識之仁之義硯乎硯與瓦礫異

武岡銘

并序

元和七年四月黔巫東鄙蠻獠雜擾盜弄庫兵賊脇守帥南鉤

牂牁外誘西原置魁立帥殺牲盟誓洞窟竹籬嘯呼成群皇帝  
下銅獸符發庸蜀荆漢南越東甌之師四面討問畏罪憑阻逃  
遁不即誅時惟潭部戎師御史中丞柳公綽練立將校提卒五  
百屯于武岡不震不騫如山如林告天子威命明白信順亂人  
大恐視公之師如百萬視公之令如風雷怨號呻吟喜有攸訴  
授刃頓伏願完父子卒爲忠信奉職輸賦進北華人無敢不聽  
母弟生壻繼來于潭咸至天廷皇帝休嘉式新厥命兇渠同惡  
革面向化如醉之醒如狂之寧公爲藥石俾復其性詔書顯異  
進臨江漢益兵三倍爲時碩臣殷于大邦文儒申申有此武功  
於是夷人始復聞公之去相與高蹈涕泣若寒去裘昔公不夸  
首級爲已能力專務教誨俾邦斯平我老洎幼由公之仁小不  
爲虺蜮大不爲鯨鯢恩重事特不迺而遠莫可追已願銘武岡  
以慰我思以昭我類以示我子孫彌億萬年俾我奉國如今之

誠鄰之我懷如公之勤其辭曰

黔山之嶺巫水之磻魚駭而離獸犯而殘戶恐谷竄披攘仍亂  
王師來誅斯死以緩公明不疑公信不欺援師定命俾邦克正  
皇仁天施我反其性我塗四闔公示之門我愚抵死公示之恩  
既骨而完既亡而存奉公之訓貽我子孫我始蠶賊由公而仁  
我始寇讎由公而親山畋澤獻輸賊于都陶穴刊木室我姻族  
烹牲是祀公受介福揅著以古公宜百祿皇懋公功陟于大邦  
遠哉去我誰嗣其良有宥之丹有屏之顛匪曰余固公不可賂  
祝鄰之德恒遵公則勗余之世永謹邦制南夷作詩刻示來裔

井銘

婦州之人各以麗甄負江水莫克井飲崖岸峻厚旱則水益遠  
人陟降大艱雨多塗則滑而顛恒惟咨嗟怨惑訛言終不能就  
元和十二年三月朔命爲井城北隍上未晦果寒食冽而多泉邑

人以灌其土堅垆其利悠久其深八尋有二尺銘曰  
盈以其神其來不窮惠我後之人噫疇肯似于政其來日新

門銘

盧仝

貪殘姦醜狡佞訐慢身之八殺背惠恃已狎不肖妬賢才命之  
四孽有是有此余敢辭無是無此余之師一日不見余心思思  
其人懼其人其交其難敢告于門

陋室銘

劉禹錫

山不在高有仙則名水不在深有龍則靈斯是陋室惟吾德馨  
苔痕上階綠草色入簾青談笑有鴻儒往來無白丁可以調素  
琴閱金經無絲竹之亂耳無案牘之勞形南陽諸葛廬西蜀子  
雲亭孔子云何陋之有

几銘

親仁可以自託友賢可以自扶求仁得仁必馳必驅若隱几以

召憑几而呼則仁賢斯遯斯侵來廷嗚呼賢旣遯身即孤

擊蛇笏銘

石守道

天地至大有邪氣干於其間爲凶暴爲殘賊聽其肆行如天地  
郊育之而莫禦也人生取靈或異類出於其表爲妖恠信其異  
端如人蔽覆之而莫靈也祥符某年寧州天慶觀貞武像下有  
蛇妖極恠異郡刺史日兩至於其庭朝焉舉州人內外遠近罔  
不駭奔於門以覲恭莊肅祗無敢怠者今龍圖侍御孔公時佐  
幕在是邦亦隨郡刺史於其庭公曰明則有禮樂幽則有鬼神  
是蛇不以誣乎惑吾民亂吾俗殺無赦以手板擊其首遂斃於  
前則蛇無異焉郡刺史暨州內外遠近庶民昭然若發蒙見青  
天覩白日故不能肆其凶殘而成其妖惑易曰是故知鬼神之情  
狀公之謂乎夫天地間有純剛至正之氣或鍾於物或鍾於  
人入有死物有盡此氣不滅烈烈然彌亘億萬世而長在在堯

時爲指倭草在魯爲孔子誅少正卯又在齊在晉爲董吏筆在漢武帝爲東方朔載在成帝朝爲朱雲劔在東漢爲張綱輪在唐爲韓愈論佛骨表逐鱷魚文爲段太尉擊朱泚笏今爲公擊蛇笏故倭人去堯德聰少正卯戮孔法舉罪趙盾晉人懼辟崔子齊刑明距董偃折張禹劾梁冀漢室又佛老微聖德行鱷魚徙潮士風振恠蛇死妖氣散噫天地鍾純剛至正之氣在公之笏豈徒斃一蛇而已軒陞之下有罔上欺君先意順旨者公以此笏指之廟堂之上有蔽賢蒙惡違法亂紀者公以此笏麾之朝廷之內有諛容佞色附邪皆正者公以此笏擊之夫如是則軒陞之下不仁者去廟堂之上無姦臣朝廷之內無佞人則笏之功也豈止在一蛇公以笏爲仕笏得公而用公方爲朝廷正人笏方爲公之良器敢稱德于公作笏銘曰

至正之氣天地則有笏惟靈物笏乃能受笏之爲物純剛正直



公惟正人公乃能得笏之在公能破淫妖公之在朝諛人乃消  
靈氣未竭斯笏不折正道未亡斯笏不藏惟公寶之烈烈其光

槃水銘

司馬君實

槃水之盈止之則平平而後清清而後明勿使小歆小歆則傾  
傾不可收用毀其成嗚呼奉之可不兢兢

司馬公布衾銘

范堯夫

藜藿之甘綈布之溫名教之樂德義之尊求之孔易享之常安  
錦繡之奢膏粱之珍權寵之盛利慾之繁苦難其得危辱旋臻  
舍難取易去危就安至愚且知士寧不然顏樂簞瓢萬世師模  
紂居瓊臺死爲獨夫君子以儉爲德小人以侈喪軀然則斯衾  
之陋其可忽諸

徐州蓮花漏銘

蘇子瞻

故龍圖閣直學士禮部侍郎燕公肅以創物之智聞於天下作

蓮花漏世服其精凡公所臨必爲之今州郡徃徃而在雖有巧者莫敢損益而徐州獨用暫人衛朴所造廢法而任意有壺而無箭自以無目而廢天下之視使守者伺其滿則決之而更注人莫不笑之國子博士傅君楊公之外曾孫得其法爲詳其通守是邦也實始改作而請銘於軾銘曰

人之所信者手足耳目也目識多寡手知輕重然人未有以手量而目計者必付之於度量與權衡豈不自信而信物蓋以爲無意無我然後得萬物之情故天地之寒暑日月之晦明昆侖旁薄於三十八萬七千里之外而不能逃於三尺之箭五斗之餅雖疾雷霾風雨雪晝晦而遲速有度不加虧贏使凡爲吏者如餅之受水不過其量如水之浮箭不失其平如箭之升降也視時之上下降不爲辱升不爲榮則民將靡然而心服而寄我以死生矣

三槐堂銘

天可必乎。賢者不必貴。仁者不必壽。天不可必乎。仁者必有後。二者將安取衷哉。吾聞之申包胥曰。人衆者勝天。天定亦能勝人。世之論天者。皆不待其定而求之。故以天爲茫。茫善者以怠。惡者以肆。盜跖之壽。孔顏之厄。此皆天之未定者也。松柏生於山林。其始也困於蓬蒿。厄於牛羊。而其終也。貫四時。閱千歲而不改者。其天定也。善惡之報。至於子孫。而其定也久矣。吾以所見所聞。所傳聞考之。而其可必也審矣。國之將興。必有世德之臣。厚施而不食其報。然後其子孫能與守文。太平之主。共天下之福。故兵部侍郎晉國王公顯於漢周之際。歷事太祖太宗。文武忠孝。天下望以爲相。而公卒以直道不容於時。蓋嘗手植三槐於庭。曰。吾子孫必有爲三公者。已而其子魏國文正公相真宗皇帝。於景德祥符之間。朝廷清明。天下無事之時。享其福祿。

榮名者十有八年今夫寓物於人明日而取之有得有否而晉公脩德於身責報於天取必於數十年之後如持左契交手相付吾是以知天之果可必也吾不及見魏公而見其子懿敏公以直諫事仁宗皇帝出入待從將帥三十餘年位不滿其德天將復興王氏也歟何其子孫之多賢也世有以晉公比李栖筠者其雄才直氣真不相上下而栖筠之子吉甫其孫德裕功名富貴畧與王氏等而忠信仁厚不及魏公父子由此觀之王氏之福蓋未艾也懿敏公之子鞏與吾遊好德而文以世其家吾是以銘之銘曰

嗚呼休哉魏公之業與槐俱萌封植之勤必世乃成旣相真宗四方砥平歸視其家槐陰滿庭吾儕小人朝不及夕相時射利皇卹厥德庶幾僥倖不種而穫不有君子其何能國王城之東晉公所廬鬱鬱三槐惟德之符嗚呼休哉

遺硯銘

以此進道常若渴以此求進常若驚以此治財常思予以此書獄常思生

黃樓銘有序

陳無已

熙寧十年京東路安撫使臣某轉運使臣某判官臣某稽首言  
河決澶州南傾淮泗彭城當其衝夾以連山扼以巨梁流泄不  
時盈溢千里平地水深丈餘下顧城中井出脉發策薄兩隅西  
入通汴南懷水垣土惡不支百有餘日而後已守臣蘇軾深惟  
流亡爲天子憂夙夜不怠以勞其人興懷成兵固弊應卒外爲  
長捷乘高如虹以殺其怒內爲大堤附城如環以待其潰築二  
防於南門之外以通南山以安危疑發倉庾明勸禁以惠困窮  
以督盜賊宣布恩澤巡行內外吏民嚮化興於事功法施四邑  
誠格百神可謂有功矣宜有褒嘉以勸郡縣十月二日甲子奏

京師明年元豐正月甲子制誥諭意臣軾惟念祗承謨訓人神  
同力敢自爲功以速大戾而明揚褒大無以報稱乃作黃樓於  
東門具刻明詔以承天休而明德意使其客陳師道又爲之銘  
臣師道伏惟呂尚南仲內撫百姓外平諸侯詩美文武尹甫召  
虎南伐淮夷北伐玁狁功歌宣王君能使人以盡其才臣能有  
功以報其上古之義也臣師道又惟感而通之者道也行而化  
之者德也制法明教者政也治人成功者事也昔之詩人歌其  
政事則并其道德而傳之後王有作可舉而行顧臣之愚何與  
於此誠樂君臣之盡道云臣不佞冒死上黃樓銘其詞曰

皇治惟戒修明法度協和陰陽十有一年天災時行河失其防  
齊魯梁楚千里四遠潰亂散亡皇仁隱憂臨遣信臣以惠東方  
羸老不窮安慰撫養發散積倉流人如歸居人忘危完聚靡傷  
天叙地平明聖成人神效祥靈平告成百穀豐盈萬邦樂康

郡縣祗畏允迪聖謨終事無荒謨功不居歸休臣民邇昭遠揚  
守臣拜手夸大休嘉使民不忘改作黃樓以臨泗上述脩故當  
庶臣無佞原始念祭銘之石章以告成功以揚德聲末末無疆

家藏古硯銘

唐子西

硯與筆墨蓋器類也出處相近任用寵遇相近也獨壽夭不相  
近也筆之壽以日計墨之壽以月計硯之壽以世計其故何也  
其爲體也筆取銳墨次之硯鈍者也豈非鈍者壽而銳者夭乎  
其爲用也筆寂動墨次之硯靜者也豈非靜者壽而動者夭乎  
吾於是得養生焉以鈍爲體以靜爲用或曰壽夭數也非鈍銳  
動靜所制偕令筆不銳不動吾知其不能與硯久遠也雖然寧  
爲此勿爲彼也銘曰

不能銳因以鈍爲體不能動因以靜爲用唯其然是以能末年

講座銘

朱晦庵

紹興二十三年新安朱熹仲晦來爲吏同安兼領其學事越明年五月新作講座以臨諸生顧其所以作之意不可以不銘銘曰師道絕塞以圯其居今其言言亦莫我敢都前聖後師文不在茲如或覓之有儼其思立之堂壇惟以有嚴厥臨孔昭式訛爾瞻

### 四齋銘

### 志道

曰趨而挹者孰履而持曰飢而寒者誰食而衣故道也者不可須臾離子不志於道獨罔罔其何之

### 據德

語道術則無往而不通談性命則疑獨而難窮惟其厚於外而薄於內故無地以崇之

### 依仁

舉之莫能勝行之莫能至雖欲依之安得而依之爲仁由已而



由人乎哉雖欲違之安得而違之

游藝

禮云樂云御射書數俯仰自得心安體舒是之謂游以游以居  
嗚呼游乎非有得於內孰能如此其從容而有餘乎

茅齋銘

魏華父

茅之爲物可植可菑可藉可毳可包可束堅剛潔白君子之屬  
肆古宮室編茅架木土階簡簡清廟肅肅侯直分社農絢乘屋  
上下同然儉而易足匪惟著儉抑亦觀德於泰象陽於詩比玉  
瓦葺之分考工所錄迨其流弊文題刻楠去潔尚華損剛從欲  
趙君之居澗泉之目章泉之詩古義是篤睹名知訓我銘維告